

Tūtohinga Rangahau mō Aotearoa

Ki te kotahi te kākaho ka whati, ki te kāpuia e kore e whati

Kīngi Tāwhiao

Ngā tūmanako

Ka puta ngā tikanga rangahau haepapa me te kounga ina tika ana te mahi a ngā kairangahau, ā, e tautokona ana, e whakatenatenahia ana rātau e ngā whakahaere rangahau me ngā kaituku pūtea e ū ana ki ngā paerewa ngaio taumata tiketike me te hāpai i te painga o te iwi whānui. I taua āhuatanga, ko tā ngā rangahau:

1. Me pono, me ngaio te āhua, ā, me pukumahi, me tūpato te rangahau mā te whai i ngā tikanga tōtika;
2. Me ngana te whai kia kairangi te rangahau, e whakaatu ana i ngā whanonga taumata tiketike me te hāpai i te wairua pono;
3. Me whakaaronui ki ētahi atu tāngata, me te whai i ngā tikanga ahurea me te whakaaro pūkenga me te whakamaioha i ngā uara rerekē me ngā hāpori rerekē (manaakitanga);
4. Me whakapau kaha ki te tautuhi me te whakawhitiwhiti ki te hunga whai pānga, ngā hāpori whai pānga rānei (whakapapa), te whakamana i ō rātau motika (mana), me te manaaki i ō rātau pānga (tika), me ngā pānga ā-reanga;
5. Ina taea, me mahi tahi me ngā mana whenua, te tangata whenua, ngā iwi, ngā hapū, ētahi atu hāpori rānei e pā tika tonu nei ki a rātau te rangahau, arā pea ko te whakamahi i ngā tikanga rangahau tōtika pērā i te kaupapa Māori, te rangahau, ngā ara rangahau, ara mahi tahi rānei i hangaia ngātahitia, i tukuna ngātahitia hoki me aua pātui;
6. Me ū ki ngā whakaritenga matatika, ā-ture katoa, me te whakatinana i ngā paerewa tikanga hāngai;
7. Me whakamaru i te hauora, te haumaruru, te oranga me ngā motika o te hunga whai wāhi mai, ka whai pānga rānei ki ā rātau mahi rangahau;
8. Me haepapa te whakahaere i ngā taonga, ngā raraunga, ngā tipako me ngā pūkete i hangaia, i kohia rānei e rātau;
9. Me whai whakaaro ki ngā pānga o ā rātau rangahau me ngā tikanga mahi rangahau ki te taiao (kaitiakitanga);
10. Me whakapuaki, me whakahaere i ngā take whai taharua;
11. Ka whakapuaki anake i tō rātau mātau e hāngai ana ki ō rātau mōhio, pūkenga hoki;
12. Me tika te whakahua i te hunga i tautoko, i tuku pūtea rānei ki te rangahau, ā, me tika te whakahua i ngā mahi a ētahi atu;
13. Me tautoko i te painga ki te iwi whānui mā te whai whakaaro ki ō rātau paiherenga ki te iwi whānui, e whakaaroaro ana ki ngā mutunga iho ka taea mai i ā rātau rangahau, te wawe o te tuku haere i ngā otinga me ngā kitenga ina tika ana, me te haepapa o te whakawhitiwhiti kōrero ki te iwi whānui.

Ka tautoko atu anō ngā whakahaere rangahau ina rātau ka:

14. Whakatū me te ū ki ngā tikanga poari whakahaere me ngā tikanga tumuaki whakahaere hei tautoko me te whakatenatena i ngā tikanga rangahau haepapa;
15. Tuku i ngā whakaahuru tōtika, ngā pūnaha tautoko me ngā whakangungu, mātauranga, kaiako pono haere tonu mā ngā kairangahau me rātau kei ngā tūranga hāngai i roto i ā rātau whakahaere tautoko;
16. Haumaruru te whakaputu, te whakahaere me te āhei atu ki ngā taonga rangahau, ngā raraunga, ngā tipako me ngā pūkete mō te whakamahi ā muri ake;
17. Whakamahi i ngā tukanga tikanga mahi pai mō te whiwhi māharahara, amuamu rānei mō ngā take e pā ana ki ngā whanonga rangahau koretake pea, te whakatewhatewha me te whakatauri i aua take, me te whai i ngā tūmahi hei whaiwhai ake.

Ka tuku tautoko ngā kaituku pūtea ina rātau ka:

18. Whakamahi i ngā tukanga tikanga pai[s] hei whakaū, mēnā ka tukuna, ā, ka tika te whakahaere i ngā pūtea i tonoa, ka whakahaeretia ngā rangahau e te hunga mātau me te ū ki ngā whakaritenga matatika, ā-ture hoki;
19. Taunaki i te ōritetanga, te kanorau me te whakaurunga, te rapu ki te whakawhānui ake i te whai wāhitanga mai me te āhukahuka i ngā rōpū e iti nei te kitea i roto i te hāpori rangahau o Aotearoa;
20. Tuari i ngā tikanga pai, ā, mēnā he kaituku pūtea tūmatanui, me whakahāngai i ngā whakaritenga ki ētahi atu kaituku pūtea tūmatanui hei whakaiti i te taumahatanga ki ngā kaiwhiwhi pūtea me ngā kaitono.



He kōrero ati anō kei

royalsociety.org.nz/research-charter-aotearoa-new-zealand